

Mimiz

秘密



Moix boux vunz ndawsim cungj miz di mimiz, aiq dwg saeh siengsim doenghbaez, aiq dwg vahgyaj simndei…… Ndawsim gou hix yo miz aen mimiz mbouj hawj vunz rox ndeu, baez siengj hwnj couh roxnyinh najmong.

Ngoenzde dwg ngoenz singhgizhaj, banringz cuengqhag ma ranz, gou ganjgip sij cozyez, aenvih daxmeh wngqcingz gou, coumued sij sat cozyez ndaej yawj denyingj 《Hahli·Bohdwz》ciz ndeu. Vihliux caeux di ndaej raen Hahli·Bohdwz gou gyaез haenx, gou vaiqdangq sij cozyez, caen siengj ciq gaiqfapswd daeuj yungh mbat ndeu. Hoeng diuz cimgung gwnz aencung lumj daegdaengq caeuq gou doxdingj nei, byaij ndaej gig vaiq, mbouj yaep ndeu couh daengz banhaemh bet diemj cung lo. Ai, saw Yinghyij gou lij caengz boih caeuq maegsij ne, yawjdaej ngoenzneix mbouj ndaej yawj 《Hahli·Bohdwz》lo. Hoeng gig vaiq, aen “gvejigeiq” ndeu sawqmwh ndonj okdaeuj. Ngoenzneix daxmeh gyaban, mboujmiz gou cigciep cau govwnz suenq lo, couh mbouj maegsij lo, gou guj daxmeh hix mbouj miz seizgan genjcaz gou boih saw. Hoeng youh siengj, mbouj ndaej, neix mbouj dwg yaeuh daxmeh ha? Gou gig veiznanz. Seizde, Fuzdimoz dwgcaengz ndaw 《Hahli·Bohdwz》okyienh ndaw uk gou: “Ngoenzneix, gou couh caeuq Hahli·Bohdwz gietdai lo, mwngz lij mbouj ganjgip daeuj yawj dou doxbuek ha?” Gangj sat riuhaha couh bae’ngwtngwt. A, gou caiq hix nyaenx mbouj ndaej, rubrab cau govwnz baez ndeu, couh hai dennauj yawj denyingj lo.

Seizgan vuenyungz cungj dwg dinjded, gou ngamq yawj sat denyingj, lij caengz daj gig angqyangz Hahli·Bohdwz hoenx hingz Fuzdimoz singj daeuj, daxmeh dauqma lo. Gou ganjgip gven dennauj, cawjdoengh caeuq daxmeh veibau: “Meh, cozyez gou cungj guh sat lo, mwngz

daeuj genjcaz ba!” Daxmeh angq dwk naeuz: “Ya, ngoenzneix baenz vaiq couh guh sat cozyez la, saw boih sug caengz?” Gou baez dingq, sim sikhaek diuq ndaej engq vaiq, dai lo, caeuq doxmeh nyinh loek ba? A, mbouj ndaej, daxmeh aiq ndaq gou bw, vanzlij mbouj hawj gou coumued yawj denyingj bw. Hoeng mbouj nyinh loek, saeklaeuq daxmeh heuh gou boih saw hawj de dingq gou baenzlawz guh ne? W, wnggai mbouj heuh gou boih saw lo, baenz gvaiz lo, daxmeh wnggai mbouj genjcaz lo. Yienghneix gou gyajcang caemdingh: “Boih ndaej lo, gou ngoenzneix leihyungz seizgan roengzdangz guh mbangj cozyez he, ndigah ma ranz le cozyez couh mbouj lw geijlai lo.” Daxmeh dingq le, gig angq: “A, daiq ndei lo, lwg gvai rox cagaenj seizgan lo! Gvaiz lai lo, mwngz ganjvaiq ninz ba, daxmeh saenq mwngz.” Aeya, cungj suenq ndoj gvaq baez ndaq ndeu lo, gou cuengq gaemz heiq hung ndeu, ganjgip gven daeng hwnj mbonq ninz. Hoeng ninz gwnz mbonq, gou cungj ninz mbouj ndaek, “daxmeh saenq mwngz” coenz vah neix itcig heux youq ndaw uk gou. Daxmeh yienghneix saenq gou, hoeng gou cix yaeuh de, couh dwg vihliux caeux di yawj denyingj. Gou caen siengj sikhaek cung gvaqbae, lwnh saehsaed hawj daxmeh, hoeng siengjsiengj, danghnaeuz daxmeh rox gou yaeuh de haengjdingh gig siengsim, suenq lo, couh hawj gijneix ciengzlwenx baenz aen mimiz ndeu ba! Haetcog gou itdingh caeuxcaeux hwnqdaeuj laeglemx boih saw sug bae.

Gienh saeh neix yienznaeuz gvaqbae haemq nanz lo, hoeng baez siengj hwnj aen mimiz neix, gou youh nyaenq youh nyapnyuk. Gou itcig aeu baezneix guh hit, caiq hix mbouj yaeuh gvaq vunz lo.

(Gyanghsuh Swngj Nanzgingh Si Lahsaz Lu Siujyoz haj nienzgaep Lij Cwngzhau)

“Hauhdoengz Iq”

“小喇叭”

Gou gyaез va, youq ndaw gyoengq va gyaundeі, gou ceіq gyaез valwgbaenq.

Valwgbaenq gig gyaundeі. Gij saek de miz saek maeq damh, saek aeuq damh daengj. Baenz duj baenz duj valwgbaenq lumj dah sien gyaundeі nei angqfaengz ciengq go diuq foux, youh lumj baenz aen baenz aen hauhdoengz iq hoengzhoengz heuheu. Ndaw limqva miz geij gaiq simva, gangj daeuj gig geizheih, gij simva wng cungj dwg henjgim, hoeng sim valwgbaenq lumj nae hau, youh lumj duz mbaj hau gyaundeі nei, gij simva neix miz mbangj sang, miz mbangj daemq, miz mbangj soh, miz mbangj gungj. Yawj hwnjbae couh lumj geij aen simva humx gvaengz he guhcaemz, geijlai angq ha! Sijsaeq baez mup, couh mup daengz raq feih hom damhdamh ndeu. Fwn doek gwnzde, giet baenz baenz aen baenz aen cawraemx.

Valwgbaenq mbouj lau dwgrengz mbouj lau vunz ienq. Gyanghwnz sam diemj cung, valwgbaenq couh hai va lo, de hwnj baenz caeux, de boux dai’it hai va, hawj daxgoeng daengngoengz ngonzyawj. Valwgbaenq gig giemhaw, de soqlaiz mbouj caeuq vunz ceng gyaеu, valwgbaenq cawzle hwnj caeux hai va, hawj daxgoeng daengngoengz ngonzyawj, daengz banhaemh doengngoengz doek bya, gyoengqde youh bemhbongz yaek hai, dahcej ronghndwen iet aen gyaеu okdaeuj, haenx naeuz: “Dahnuengx valwgbaenq, mwngz caen gyaundeі!”

Gova go’nywj gofaex canggyaeu gwndaenj raeuz, gyoengqde couh lumj baenz duz baenz duz cinglingz iq, hawj daihdeih daiq daeuj hoengghwd!

(seiq nienzgaep Sangh Ginhyenz)



Va’gviq Seizcou

秋天的桂花

Rumzcou ci henj le faexyinzging, ci nding le go raeu, hix ci hom le go va’gviq bakdou ranz gou.

Mwh gou cingq sij cozyez, henz ndaeng mbin daeuj raq feih hom ndeu, gou cuengq roengz bit, riengz feih hom daeujdaengz laj laeuz. Mbouj rox seiz lawz, va’gviq cungj hai va lo. Va’gviq iqet hai rim gwnz nga faex, daj geh mbaw heu ndonj aen ndang okdaeuj, lumjbaenz yawjyawj aen biengz neix. Gou haeuj gyawj yawj, limqva henjrwg iqet limq nem lumq, lumj aen daengngoengz iqet nei. Gou nyaenx mbouj ndaej iet fwngz bae lumh, ngamq bungq deng, faenjva couh loenq roengzbyoegbyoeg, mbaw heu couh sikhaek daenj hwnj buhhenj.

Raq rumz liengz he ci gvaq, gou laep aen da hwnj, sup gaemz heiq hung ndeu, feih hom daiq miz di feih dangz ndonj haeuj aen ndaeng gou, gou lumjbaenz deng va’gviq humx dawz lo.

Gou gyaез va’gviq seizcou neix.

(ngeih nienzgaep Ciz Ginhsuuh)

